

A Ezio Bortolussi

PIERO PITTARO

Di muredôr a costrutôr di *buildings*. Cussì e podarès jessi scrite in struc la storie professionâl di Ezio. O zonti: de tierce medie ae laurea honoris causa. La sô storie e scomence come la solite storie dal pastôr. Al emigre in Canada, la valis di carton peade cuntun spali. Primis experiencis come operari sot di une dite edile.

Cussì mi conte intune fevelade: prime lavôrs umii. Par paie juste chel che al covente par no murî di fam, ma no avonde par comprâ bregons gnûfs. Po muredôr professionâl, anzit super-professionâl.

– E po? – O domandi jo!

Rispueste imediade e di restâ di clap:

– Parcè, se chest lavôr lu fâs il gno paron, no puedio fâlu jo diretementi? O provi cun piçulis cjasis di une desene di plans. O viôt che la robe e funzione. Di li simpri plui in sù e simpri plui complicât. O dopri plui il cerviel dai braçs. Di braçs a ‘nd è tancj.

O rivi te imprese! Mi fâs la solite domande: se lu fasin chei altris parcè no puedio fâlu ancje jo?

Cumò, tra il Canada e i Stâts Unîts o fâs sù une medie di une dozene di *buildings* ad an. Altece medie sessante, otante plans. Plui o mancul un al mê.

O soi partît di Darzin, un paisut di pocjîs animis, su la drete dal Tiliment, in chê volte province di Udin, cumò di Pordenon.

La imprese, il lavôr, i afârs, la famee, i amîs, dut al è in Nord Americhe, ma il cûr al è in mò saldât a fuart a Darzin, dulà che a pene che il tacuin mi lu à permetût, o ai dât a plenis mans.

O doi di lavorâ a miârs di personis, tancj furlans (che a àn inmò il mâl dal modon), tancj talians, canadês e americans. O soi simpri tal mieç di lôr. O clami ducj par non. O mangji cun lôr. O contin insieme lis nestrîs storiis e lis nestrîs storiutis. No mancje mai la butilie dal vin, bon par fâ movi la lenghe.

Come me, come noaltris, emigrâts di chê misare tiere furlane di chê volte, a son cetancj in dut il mont. Dîu al è par dut. I furlans a son za stâts. A cjase nestre cul Friûl, o vin vût rapuarts strets cul *Ente Friuli nel Mondo*, une sorte di leam cu la Picule Patrie. No fâs nons, ma come me e plui di me, tal mont a son tancj furlans che a àn fat robis straordenariis.

Il nestri sproc: lavôr, onestât, rispiet. Si diseve une volte: il Friûl nol dismentee, ma o disarès ancje che i furlans no dismentein il Friûl.

Dopo di vêus contât di cheste fevelade, o vuestri contâus une storie che e mostre la gjenuinitât di Ezio. Une di mi rive dal Canada un quadri suntune fete gruesse di tronc di arbul, piturât in stîl moderni di un indian. Il biliet che lu compagneve: – Se tu âs di fâ un *building* ti fâs un bon presit.

La mê rispuete: – Se tu âs di fâ une cantine o ven a fâti il vin a gratis.

Piero Pittaro
President Emerit
Ente Friuli nel Mondo